



умра Зулқаъдада. Жаъронадан, Ҳунайн ўлжаларини тақсим қилган жойларидан қилинган умра ҳам Зулқаъдада. Ва ҳажлари билан бирга қилинган умра», деди».

Учовлари ривоят қилганлар. Аллоҳ билгувчироқдир.

Шарҳ: Пайғамбар соллаллоҳу алайҳи васаллам Ислонда ҳаж фарз бўлганидан кейин бир марта видолашув ҳажини адо этганлар. Аммо ҳаж фарз бўлмасидан аввал Маккада бўлган чоғларида икки марта ҳаж қилганлар.

Пайғамбар соллаллоҳу алайҳи васаллам олтинчи ҳижрий санада саҳобалар билан умра ниятида келганларида мушриклар Ҳудайбияда уларнинг йўлларини тўсганлар. У зот ва саҳобалар ўша ерда қурбонлик сўйиб, соч олдириб, эҳромдан чиқиб, қайтганлар.

Еттинчи ҳижрий санада мушриклар билан тузилган шартномага биноан, у зот саҳобалари билан қазо умра қилганлар.

Расулуллоҳ соллаллоҳу алайҳи васаллам Ҳунайн ғазотида қўлга олинган ўлжаларни тақсимлаб бўлганларидан сўнг Жаърона деган жойдан эҳром боғлаб, яна бир бор умра қилганлар.

Видолашув ҳажиди эса ҳажга қўшиб, умра ҳам қилганлар.